

- UPRAVNI ODBOR -

Broj: 02-I-1191/07

Sarajevo, 28.06.2007. godine

Na osnovu člana 27. Zakona o ustanovama ("Službeni list R BiH", broj: 6/92, 8/93 i 13/94), člana 142. Zakona o visokom obrazovanju („Službene novine Kantona Sarajevo”, broj: 9/07 – Prečišćeni tekst) i člana 162. tačka 1. Pravila Univerziteta u Sarajevu, a u skladu sa aktom Ministarstva obrazovanja i nauke Kantona Sarajevo broj: 11-01-38-28982 od 25.05.2007. godine, Upravni odbor Univerziteta u Sarajevu, na 16. sjednici od 28.06.2007. godine, utvrdio je **prijedlog**

O D L U K E
O IZMJENAMA I DOPUNAMA
PRAVILA UNIVERZITETA U SARAJEVU

Član 1.

U Pravilima Univerziteta u Sarajevu iza člana 16. dodaje se novi član 16a. koji glasi:

“Član 16 a.

Na Univerzitetu u Sarajevu (u daljem tekstu: Univerzitet) nije dozvoljena diskriminacija zasnovana na rasi, boji kože, polu, jeziku, religiji ili vjerovanju, političkim ili drugim uvjerenjima, nacionalnom i socijalnom porijeklu.

U smislu prethodnog stava obaveza je svih organa Univerziteta (upravljanja, rukovođenja, nadzora, stručnih odbora i komisija) da u postupku imenovanja obezbijede proporcionalnu zastupljenost konstitutivnih naroda i ostalih, kao i ravnopravnu zastupljenost spolova.

U Pravilima Univerziteta imenice u muškom rodu, nosioci funkcija, studenti, akademska zvanja, izbor kandidata, i slično, odnose se na oba spola.“

Član 2.

U članu 18. stav 1 tačke 17. i 23. mijenjaju se i glase:

„17. Poljoprivredno-prehrambeni fakultet u Sarajevu, ulica Zmaja od Bosne broj 8;
23. Fakultet zdravstvenih studija u Sarajevu, ulica Čekaluša broj 90.“

Član 3.

U članu 74. u stavu 1 tačka 2. mijenja se i glasi:

„2. da li kandidat ima objavljen najmanje jedan naučni rad u skladu sa Zakonom o naučnoistraživačkoj djelatnosti („Službene novine Kantona Sarajevo“, broj: 10/04) iz oblasti prijavljene doktorske disertacije“.

Iza stava 1 dodaje se novi stav 2 koji glasi:

„Uvjeti iz tačke 2. prethodnog stava ne odnose se na procedure započete prije stupanja na snagu Zakona o izmjenama i dopunama Zakona o visokom obrazovanju („Službene novine Kantona Sarajevo“, broj: 23/06)“.

Dosadašnji stavovi 2 i 3 postaju stavovi 3 i 4 ovog člana.

Član 4.

Iza člana 92. dodaje se novi član 92a. koji glasi:

„Član 92 a.

Komisije iz člana 73. i člana 79. ovih Pravila dužne su svoje obaveze, odnosno izvještaje završiti u utvrđenim rokovima.

Ukoliko komisije iz prethodnog stava ili neki od članova ovih komisija svoje obaveze ne izvrše u predviđenom roku, Senat, nastavno-naučna vijeća, odnosno dekan visokoškolske ustanove, izreči će tim licima mjeru zabrane učešća u radu komisija u trajanju od dvije godine i imenovat nove članove.

Ako i nakon izmjene navedenih članova, komisije ne ispune obaveze u utvrđenim rokovima, primjenjuju se odredbe iz prethodnog stava, a o tome nadležni rukovodni organ i/ili zainteresovana strana obavještava resornog ministra koji će u roku od 15 dana svojim rješenjem imenovati članove tih komisija i utvrditi rokove za izvršenje rješenjem utvrđenih obaveza.“

Član 5.

U članu 106. stav 1, u alineji 2. brišu se riječi „ili stručnim“.

U alineji 4., na kraju teksta tačka se briše i dodaje tekst: „i minimalno jedno mentorstvo pri izradi doktorske disertacije“.

Stav 2. mijenja se i glasi:

„Objavljeni naučni radovi navedeni u prethodnom stavu moraju biti iz naučne oblasti za koju se nastavnik bira, a u skladu sa odredbama Zakona o naučnoistraživačkoj djelatnosti. Za objavljene knjige i monografije mora biti izvršena recenzija od strane najmanje jednog recenzenta referentnog na međunarodnom nivou iz uže naučne oblasti i obavezno se prilažu prilikom svakog izbora.“

Iza stava 3 dodaje se novi stav 4 koji glasi:

„Postupak izbora u nastavno zvanje koji je započeo prema odredbama propisa prije stupanja na snagu Zakona o izmjenama i dopunama Zakona o visokom obrazovanju („Službene novine Kantona Sarajevo“, broj: 23/06), dovršit će se prema tim odredbama, a najkasnije u roku od 6 mjeseci od dana stupanja na snagu citiranog Zakona.“

Član 6.

Iza člana 107. dodaje se novi član 107a. koji glasi:

„Član 107 a.

Izuzetno, za matične nastavne predmete specifičnog sadržaja, umjetnička akademija može vršiti izbor nastavnika i saradnika primjenom odredaba i člana 106. i člana 107. ovih Pravila.

Nastavne predmete iz prethodnog stava utvrđuje umjetnička akademija svojim pravilima uz prethodnu saglasnost Univerziteta.“

Član 7.

U članu 108. stav 2 mijenja se i glasi:

„Visokoškolska ustanova obavezna je da uz nastavnika sa navršениh 60 godina života ima izabranog docenta.“

Član 8.

Član 110. briše se.

Član 9.

Član 111. briše se.

Član 10.

Član 131. mijenja se i glasi:

„Konkurs za upis studenata u prvu godinu studija objavljuje Univerzitet dva mjeseca prije termina određenog za početak upisa studenata, a na prijedlog članica i po prethodno pribavljenoj saglasnosti Ministarstva.

Konkursom se bliže određuju uvjeti za upis na pojedini studij.“

Član 11.

Član 132. briše se.

Član 12.

Iza člana 159. dodaje se novi član 159 a. koji glasi:

„159 a.

Univerzitet, odnosno visokoškolske ustanove, za studente koji se upisuju na studij po Bolonjskom procesu, organiziraju studij u skladu sa odredbama Zakona o visokom obrazovanju (Poglavlje V – STUDIJ PO BOLONJSKOM PROCESU).“

Član 13.

U Članu 167. stav 1 tačka 2. mijenja se i glasi:

„2. predlaže Upravnom odboru Univerziteta rang listu kandidata koji ispunjavaju uslove konkursa za izbor rektora Univerziteta na osnovu propisanih uslova za izbor rektora.“

Član 14.

Član 170. mijenja se i glasi:

„Član 170.

Rektor se bira iz reda redovnih i vanrednih profesora u stalnom radnom odnosu sa punim radnim vremenom u visokoškolskim ustanovama, članicama Univerziteta.

Kandidat za rektora treba da bude ličnost koja se ističe u nastavno-naučnom ili nastavno-umjetničkom radu i u univerzitetskoj sredini uživa ugled kreativne ličnosti koja je sposobna da rukovodi složenim naučno-nastavnim i nastavno-umjetničkim sistemom kao što je Univerzitet, što dokazuje najboljim ponuđenim programom rada i razvoja Univerziteta.“

Član 15.

Član 172. mijenja se i glasi:

„Član 172.

Rektora imenuje Upravni odbor Univerziteta u skladu sa članom 29. Zakona o ustanovama i članom 105. Zakona o visokom obrazovanju.“

Član 16.

Član 173. briše se.

Član 17.

Član 175. mijenja se i glasi:

„Univerzitet ima četiri prorektora i to za slijedeće oblasti: nastavu, naučni rad, međunarodne odnose i oblast za razvoj, investicije i finansije.

Za prorektore mogu biti birani nastavnici u stalnom radnom odnosu sa punim radnim vremenom u visokoškolskim ustanovama članicama Univerziteta.

Jedan od prorektora zamjenjuje rektora u odsutnosti.“

Član 18.

Iza člana 175. dodaju se novi članovi 175 a. i 175 b. koji glase:

„Član 175 a.

Prorektori Univerziteta biraju se na osnovu javnog konkursa.

Konkursni postupak provodi komisija koju imenuje Upravni odbor Univerziteta.

Konkursna komisija dužna je u roku od 15 dana od dana zključivanja konkursa dostaviti rektoru sistematizirani izvještaj sa podacima o prijavljenim kandidatima za prorektore.

Na osnovu izvještaja iz prethodnog stava rektor predlaže Upravnom odboru kandidate za prorektore, a za mandatni period na koji je on izabran.

Prilikom predlaganja kandidata za prorektore rektor treba voditi računa o zastupljenosti grupacija visokoškolskih članica u okviru Univerziteta, kao i o nacionalnoj i polnoj zastupljenosti.

Konačni izbor prorektora vrši Upravni odbor Univerziteta.

Član 175 b.

Izabrani rektor i prorektori ne mogu vršiti funkciju dekana, prodekana i člana upravnog odbora visokoškolske ustanove članice Univerziteta.

Rektor i prorektori zadržavaju postojeći radno-pravni status na matičnoj visokoškolskoj ustanovi, a obavljanje funkcije rektora, odnosno prorektora uredit će se posebnim sporazumom između Univerziteta i matične visokoškolske ustanove članice Univerziteta.“

Član 19.

Zadužuje se Služba za pravne poslove Sekretarijata Univerziteta da sačini prečišćen tekst Pravila Univerziteta u Sarajevu.

Član 20.

Ova odluka stupa na snagu narednog dana od dana davanja saglasnosti Ministarstva obrazovanja i nauke Kantona Sarajevo.

**PREDSJEDNIK
UPRAVNOG ODBORA**

Prof. dr. Sead Redžepagić

